

Tunjuk Perasaan Penuntut-penuntut Malaysia di Kaherah yang Menaikkan Kemarahan Tengku

Masalah “Undang-undang Bahasa Kebangsaan di Malaysia” rupanya telah berbahang sehingga kepada penuntut Melayu di Kaherah. Mereka mengadakan tunjuk-tunjuk perasaan dan berarak menuju ke Kedutaan Malaysia di Kaherah untuk menyampaikan suatu bantahan yang khabarnya ditulis mereka dengan darah mereka.

Langkah bantahan atas soal ini di luar negeri oleh penuntut-penuntut adalah dipandang kurang baik kerana dengan sendirinya merugikan kepada nama baik Malaysia sedang hasil daripada bantahan itu tidak didapati.

Sememangnya perkara ini tidak menyenangkan kerajaan Malaysia sehingga Tengku Abdul Rahman telah memerintahkan hendak menutup asrama penuntut-penuntut Melayu di Mesir itu.

Hal ini berbangkit mungkin daripada kurang penjelasan yang diberi dan disampaikan kepada mereka atas duduknya perkara itu – dan sebagaimana yang dikatakan oleh Tuan Haji Abdul Rahman bin Haji Ya’akub, Menteri Galian dan Tanah tatkala melawat di Makkah, penuntut-penuntut nampaknya kurang difahamkan dan sekarang mereka telah faham keadaannya dan perasaan mereka itu telah reda – *al-hamduli’Lāh!*

Gambar di bawah: Penuntut-penuntut yang sedang marah sedang membakar sebuah keranda Perikatan yang khabarnya dibuat daripada kertas-kertas surat khabar bertulisan Melayu tempatan di Kuala Lumpur.

Kiri atas: Seorang penuntut wanita sedang memberi ucapan memberangsangkan penuntut-penuntut yang menunjuk perasaan itu

Kiri bawah: Penuntut-penuntut sedang hendak berarak dengan aman menuju ke Kedutaan Malaysia di Kaherah.



